

- मुख्यमंत्री अशोक गहलोत कह्यो- बिहार री भांत राजस्थान मांय ई जातीय सर्वे करायो जावेला।
- प्रधानमंत्री नरेन्द्र मोदी स्वतंत्रता दिवस रे मौके दिया ज्या भाषण मांय एलाण करी ज्या जनता रा भला रा कामां री प्रगति रो जायजो लीनो।
- उपराष्ट्रपति जगदीप धनखड किसानां ने देश री माली व्यवस्था री रीढ़ बताता थकां वां रा भला सारु काम करण बाबत् कह्यो।
- चीन मांय व्ह्या एशियाई खेलां मांय भारत सोना रा 28 तमगां समेत 107 तमगा जीत र चौथी ठौड़ माथे रह्यो।

मुख्यमंत्री अशोक गहलोत कह्यो है के राज्य मांय ई बिहार री भांत जातिगत सर्वे करावण सारु बेगा ई हुकम जारी कर्या जावेला। वे आज जयपुर मांय खबरनबीसां सागे बातचीत करता थकां कह्यो के कांग्रेस रायपुर अधिवेशन मांय ई बारा मांय फ़ैसला कीनो हो। वे कह्यो के ई सर्वे ऊं पिरवारां री माली हालत री ठा करी जा सकेला।

.....
ध्यानजोग है के मुख्यमंत्री काल रात ई जयपुर मांय कांग्रेस वार रुम मांय व्ही मीटिंग पाछे राज्य मांय जातीय सर्वे करावण री बात कही ही।

000

प्रधानमंत्री नरेन्द्र मोदी स्वतंत्रता दिवस रे मौके लाल किला ऊं दिया ज्या भाषण मांय करी ज्या न्यारा-न्यारा ऐलाण ऊं जुड्या कामां रो जायजो लेवण सारु आज नई दिल्ली मांय मीटिंग कीनी। स्वतंत्रता दिवस रे मौके वां रा भाषण मांय प्रधानमंत्री गरीब अर मझला तबका री जनता ने रहवास मुहैया करावण सारु कफायती कर्ज तैय करण रो जिक्र कीनो हो। मीटिंग मांय वे ई ऐलाण ने लागू करण रा बारा मांय करी जा रही तैयारियां रो जायजो लीनो। प्रधानमंत्री वां रा भाषण मांय घरां सारु सौर ऊर्जा तैय करण रो ई जिक्र कीनो हो। मीटिंग मांय ई री तैयारियां रो ई जायजो लियो ज्यो।

000

उपराष्ट्रपति जगदीप धनखड आज 'राष्ट्रीय बीज निगम लिमिटेड' रा केंद्रीय राज्य फार्म, सूरतगढ़ रो दौरा कीनो। ई मौके 'राष्ट्रीय पशुधन मिशन योजना' रा तैत राखी ज्यी कृषक संगोष्ठी' मांय उपराष्ट्रपति वां रा राजस्थान रा दौरां माथे सवालां परां पीड़ा जताता थकां कह्यो के वां रा दौरा खास तौर ऊं खेती-बाड़ी ऊं जुड्या संस्थानां अर किसानां रा विकास अर उन्नति ऊं जुड्या है। वे कह्यो के किसान भारत री माली व्यवस्था री रीढ़ है अर वां रा भला रो ध्यान राखणो सगळां री जिम्मेदारी है। खेती ऊं जुड्या बदलावां रो जिक्र करता थकां धनखड कह्यो के भारत रा किसानां ने तकनीक रो पूरो फायदो उठा र उत्पादकता अर गुणवत्ता मांय सुधार लावणो चाहिजे। वे कह्यो के तकनीक न केवल उपज सारु बल्कि निर्यात, आयात, अर विपणन रा हलकां मांय ई किसानां सारु फायदेमंद साबित व्हे सके है। ई मौके केंद्रीय कृषि राज्य मंत्री कैलाश चौधरी अर सांसद निहालचंद ई मौजूद हा। उपराष्ट्रपति जोधपुर रा केन्द्रीय शुष्क क्षेत्र अनुसंधान संस्थान -काजरी मांय ई कृषि वैज्ञानिकां अर काश्तकारां सागे बातचीत कीनी। ई मौके वे कह्यो के देश मांय परम्परागत खेती सागे खेती रा नुवा तरीका अपनावण री जरूरत है। वे कह्यो के लारला कुछ साल मांय देश मांय खेतीबाड़ी रा हलका मांय आया तकनीकी बदलाव ने और आगे ले जावण री जरूरत है। धनखड किसानां अर वैज्ञानिकां सागे कृषि विषयां अर नवाचारां रा बारा मांय चर्चा कीनी। इण ऊं पैली उपराष्ट्रपति हनुमानगढ़ जिला रा गोगामेड़ी मांय श्री जाहरपीर गोगाजी रा दर्शन कीना।

000

नुवा बणायी ज्या अनूपगढ जिला मांय खाजूवाला अर छत्तरगढ तहसीलां ने शामिल करण रा लगातार विरोध पाछे सरकार खाजूवाला अर छत्तरगढ तहसीलां ने ओजू बीकानेर जिला मांय शामिल कर दीना है। राजस्व विभाग अनूपगढ अर बीकानेर जिलां रा ओजू सीमांकन री अधिसूचना जारी कर दीनी है। अनूपगढ जिला मांय अब 4 उपखंड अर 5 तहसीलां रह गयी है। बीकानेर जिला मांय अब 7 उपखंड अर 9 तहसीलां व्हे गयी है।

000

इन्दिरा गांधी परियोजना ऊं ई दफा काश्तकारां ने आठ बार पाणी दियो जावेला। ई बाबत् सिंचित क्षेत्र विकास आयुक्त कार्यालय रेगुलेशन जारी कर दीनो है। अधीक्षण अभियंता विवेक गोयल रे मुजब आज ऊं नहर ऊं पाणी देवणो सरू कर दियो ज्यो है। 14 दिसम्बर ताई 4 मांय ऊं 2 समूहां मांय पाणी दियो जावेला। 14 दिसम्बर ऊं 28 फरवरी 2024 ताई नहरां मांय 3 मांय ऊं एक समूह मांय पाणी चलायो जावेला। 16 मार्च ताई नहरां मांय 4 मांय ऊं 2 समूहां मांय पाणत सारू पाणी चलायो जावेला।

000

चीन मांय व्ह्या एशियाई खेलां मांय भारत 107 तमगा जीत्या है। आं मांय सोना रा 28, चांदी रा 38 अर कांसा रा 41 तमगा भेळा है। भारत कुल 107 तमगा जीत र चौथी ठौड़ माथे रहयो। एशियाई खेलां रा इतिहास मांय भारत पहली दफा ओ मुकाम हासिल कीनो है। भारत आज बारह तमगा जीत्या। कंपाउण्ड तीरंदाजी होड़ मांय ज्योति सुरेखा वेन्नम अर ओजस देवतले सोना रो तमगो जीत्यो। महिला कबड्डी रा फाइनल मांय भारत री टीम चीनी ताइपे ने शिकस्त दे र देश सारू आं खेलां मांय एक सौ वों तमगो जीत्यो। भारत री महिला कबड्डी टीम लगातार चौथी दफा एशियाई खेलां मांय सोना रो तमगो जीत्यो। पुरुषां री कबड्डी रा फाइनल मांय भारत ईरान ने हरा र सोना रो तमगो जीत्यो। पुरुषां री क्रिकेट होड़ मांय ई भारत ने सोना रो तमगो मिल्यो। फाइनल मुकाबला मांय भारत अफगानिस्तान रे खिलाफ टॉस जीत र पैली अफगानिस्तान ने बल्लेबाजी करण सारू बुलायो। बिरखा रे कारण मैच रोक्वो जावण ताई अफगानिस्तान 19 वां ओवर मांय 112 रन बणा लीना हा अर वां रा 5 बल्लेबाज आउट व्हे ग्या हा। ई पाछे मैच रो फ़ैसलो वरीयता रा आधार ऊं करी ज्यो अर भारत ने सोना रो तमगो दियो ज्यो। बैडमिंटन री पुरुष डबल्स होड़ मांय विराग शेटी अर सात्विकसाईराज रंकी रेड्डी री जोड़ी सोना रो तमगो जीत्यो। तीरंदाजी रा पुरुष कंपाउंड मुकाबला मांय अभिषेक वर्मा चांदी रो तमगो जीत्यो। महिला कंपाउंड तीरंदाजी रा सिंगल्स मुकाबला मांय अदिति कांसा रो तमगो जीत्यो। पुरुषां री फ्रीस्टाइल कुश्ती रा 86 किलोग्राम भार वर्ग मांय दीपक पुनिया चांदी रो तमगो जीत्यो। पुरुष अर महिला शतरंज होड़ मांय ई भारत चांदी रा तमगा जीत्या। महिला हॉकी होड़ मांय भारत जापान ने शिकस्त दे र कांसा रो तमगो जीत्यो। एशियाई खेलां मांय ओ भारत रो सब ऊं बेहतर खेल रो दरसाव है।

राष्ट्रपति द्रोपदी मुर्मू 19 वां एशियाई खेलां मांय सौ तमगा जीतण परां भारत रा खिलाडियां ने बधाई दीनी है। वे एक सोशल मीडिया पोस्ट मांय कह्यो के एशियाई खेलां मांय पहली दफा एक सौ तमगा जीत र भारत इतिहास रच दीनो है। प्रधानमंत्री नरेन्द्र मोदी ई एक सौ तमगा जीतण परां भारत रा खिलाडियां ने बधाई देता थकां सोशल मीडिया पोस्ट रे जरिये कह्यो के आ एशियाई खेलां मांय भारत सारू यादगार उपलब्धि है। खेल मंत्री अनुराग सिंह ठाकुर ई भारत रा खिलाडियां ने बधाई दीनी है। नई दिल्ली मांय खबरनबीसां सागे बातचीत करता थकां वे कह्यो के अ खिलाड़ी आवता खिलाडियां सारू प्रेरणा-स्रोत बणेला।

एशियाई खेलां मांय भारत सारू एक सौ वों तमगो जीतण वाळी महिला कबड्डी टीम मांय 4 खिलाड़ी राजस्थान री है। अ सगळी खिलाड़ी राजस्थान पुलिस मांय सेवा दे रही है। राज्य रा पुलिस महानिदेशक उमेश मिश्रा कबड्डी खिलाड़ी निधिर शर्मा, सुषमा शर्मा, साक्षी कुमारी और मुस्कान मलिक ने टीम कानी ऊं सोना रो तमगो जीतण परां बधाई दीनी है। पुलिस महानिदेशक गोला फैंक होड़ मांय देश सारू कांसा रो तमगो जीतण परां एसआई किरण बालियान ने ई शुभकानावां दीनी।

000

स्वच्छता ही सेवा रा तहत आज सीमा सुरक्षा बल राजस्थान फंटियर मुख्यालय जोधपुर रा न्यारा-न्यारा दफतरां मांय साफ-सफाई करी ज्यी। ई अभियान मांय फंटियर मुख्यालय जोधपुर रा अहलकार अर जवान शिरकत कीनी। राजस्थान फंटियर रा तैत आवण वाळा सरहदी जिलां श्रीगंगानगर, अनूपगढ, बीकानेर अर जैसलमेर मांय क्षेत्रीय मुख्यालयां अर बटालियन मुख्यालयां कानी ऊं ई दफतरां मांय साफ-सफाई करी ज्यी अर जूनी फाईलां रो निपटारो करी ज्यो।

000

जैसलमेर जिला रा पोकरण मांय ट्रेलर अर जीप री टक्कर रे कारण व्ह्या हादसा मांय जीप मांय सवार चार जणां री मौत व्हेगी। मरण वाळां मांय एक महिला ई शामिल है। पोकरण रा फलसूंड कने मदुरासर गांव कने व्ह्या ई हादसा मांय घणा जख्मी व्ह्या एक जणा ने फलसूंड रा सरकारी सफाखाना मांय भर्ती करायी ज्यो है।

000

दुनिया भर मांय मान्योडा पुष्कर तीर्थ मांय नगरपालिका सरोवर हलका रा फोटो खींचण अर वीडियो बणावण परां रोक लगा दीनी है। नगरपालिका बोर्ड री साधारण सभा मांय ओ फैसलो करी ज्यो। नगरपालिका रा 25 वार्डा री हद मांय मांस, मदिरा अर नशीली चीजां काम लेवण अर बेचण परां ई रोक लगा दीरीजी है। मीटिंग मांय सरोवर मांय नहाती बगत साबुन अर शौंपू काम लेवण अर गंदगी करण वाळां माथे ई दो हजार रूप्या ताई रो जुर्मानो लगावण रो फैसलो करी ज्यो।

000

केन्द्रीय माध्यमिक शिक्षा बोर्ड चालू शैक्षणिक सत्र सारू नवीं अर ग्यारहवीं कक्षा रा विद्यार्थियां रा ऑनलाइन पंजीयन री आखिरी तारीख 25 अक्टूबर कर दीनी है। बोर्ड रा अजमेर दफतर ऊं मिली जाणकारी रे मुजब स्कूल प्रबंधन बोर्ड री अधिकृत वेबसाइट माथे मौजूद परीक्षा संगम लिंक माथे विद्यार्थियां रा नाम मंडा सके है। बोर्ड स्कूलां ने विद्यार्थियां रा विषय री जाणकारी दाखिल करती बगत सावधानी राखण बाबत् कह्यो है, कांकि पंजीयन व्ह्यां पाछे विषय मांय सुधार नी कर्या जा सकेला।

000